

Апостол 23.06.2024

Б: Мир всем.

Я: И духови твоему.

Б: Премудрость.

Я: Прокимен глас 8:

Во всю землю изыде вещание их, / и в концы вселенных глаголы их.

Хор: Во всю землю изыде вещание их.....

Я: Небеса поведают славу Божию, творение же руку Его возвещает твердь.

Хор: Во всю землю изыде вещание их.....

Я: Во всю землю изыде вещание их

Хор: и в концы вселенных глаголы их.

Б: Премудрость.

Я: Деяния святых Апостол чтение.

Б: Вонмем

Егда скончавашася дние Пятидесятницы, беша вси апостоли единомысленно вкупе. И бысть внезапно с небесе шум, яко носиму дыханию бурну, и исполни весь дом, идеже бяху сядуще: и явишася им разделени языцы яко огненни, седе же на едином коемждо их. И исполнишася вси Духа Свята и начаша глаголати иными языки, якоже Дух даяше им проповедати. Бяху же во Иерусалиме живущии иудее, мужие благоговейнии, от всего языка, иже под небесем. Бывшу

же гласу сему, снидеша народ и смятеша, яко слышаху един кийждо их своим языком глаголющих их. Дивляхуся же вси и чудяхуся, глаголюще друг ко другу: не се ли, вси сии суть глаголющии галилеане? И како мы слышим кийждо свой язык наш, в немже родихомся, парфяне и мидяне и еламита, и живущии в Месопотамии, во Иудее же и Каппадокии, в Понте и во Асии, во Фригии же и Памфилии, во Египте и странах Ливии, яже при Кирии, и приходящии римляне, иудее же и пришелцы, критяне и аравляне, слышим глаголющих их нашими языки величия Божия?
*(Деян 2:1-11, зач. 3)

Б: Мир ти.

Я: И духови твоему.

Б: Премудрость.

Я: Аллилуиа глас 1

Хор: Аллилуиа 3 раза

Я: Словом Господним небеса утвердишася, и Духом уст Его вся сила их.

Хор: Аллилуиа 3 раза

Я: С небесе призре Господь, виде вся сыны человеческия.

Хор: Аллилуиа 3 раза